

## **COMISIÓN INFORMATIVA DE TURISMO, TERMALISMO E MEDIO AMBIENTE**

**ACTA** da mencionada comisión informativa, correspondente ao día **21 de setembro de 2023**

Ás 17.29 horas do día 21 de setembro de 2023, réunese a Comisión Informativa de Turismo, Termalismo e Medio Ambiente, en sesión ordinaria, na sala de xuntas da Deputación Provincial, coa asistencia dos seguintes deputados e deputadas:

**Presidente:** D. Luís Menor Pérez

### **Deputados/as do Grupo Popular:**

D. Jorge Pumar Tesouro

D.<sup>a</sup> Marta Nóvoa Iglesias

D.<sup>a</sup> Patricia Torres Madureira

D.<sup>a</sup> M.<sup>a</sup> del Carmen González Quintela

D. José Miguel Pérez Blecua

### **Deputados/as do Grupo Socialista:**

D. Álvaro Vila Araújo

D.<sup>a</sup> Susana Rodríguez Estévez

D. Aurenitno Alonso Araújo

D.<sup>a</sup> Marina Vaz Quintillán

### **Deputados de Democracia Ourensana:**

D. Armando Ojea Bouzo

D. Gonzalo Pérez Jácome

### **Deputados/as do BNG:**

D.<sup>a</sup> María José Mangane Guede

D. Xosé Manuel Puga González

**Secretario:** D. Adamantino Barreiro García

**Interventora:** D.<sup>a</sup> Begoña Álvarez Matos

Non asiste a deputada do Grupo Popular dona María Teresa Barge Bello, que é substituída por don José Miguel Pérez Blecua.

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

### **1º.- CONSTITUCIÓN DA COMISIÓN.-**

De acordo co previsto nos artigos 135 e 138 do ROF, onde se dispón que a válida realización das sesións das comisións informativas require a presenza da maioría absoluta dos compoñentes da comisión, titulares ou suplentes, en primeira convocatoria (e un mínimo de tres membros en segunda convocatoria unha hora máis tarde, e que en todo o non previsto serán de aplicación as disposicións sobre funcionamento do pleno, unha vez constatada a existencia de quórum suficiente, declárase validamente constituída a comisión.

### **2º.- APROBACIÓN DO CONVENIO DE CONVENIO PARA O EXERCICIO POR PARTE DA DEPUTACIÓN PROVINCIAL, EN RÉXIME DE COMPETENCIA DELEGADA, DAS FUNCÍONS MUNICIPAIS EN MATERIA DE POLICÍA MEDIOAMBIENTAL DE VERTIDOS ÁS REDES E INFRAESTRUTURAS MUNICIPAIS DE SANEAMENTO E DEPURACIÓN DE AUGAS RESIDUAIS NOS CONCELLOS DE O PEREIRO DE AGUIAR E SAN CIBRAO DAS VIÑAS**

**D.<sup>a</sup> Patricia Torres Madureira, do Grupo Popular**, indica que este é un convenio que xa estaba asinado e funcionando e trátase dunha renovación. É unha cooperación da Deputación cos concellos da nosa provincia que teñen un calado industrial e pide que se vote a favor.

**D. Armando Ojea Bouzo, de DO**, indica que votarán a favor.

**D. Xosé Manuel Puga González, do BNG**, di que reservan o voto aínda que son conscientes da problemática que hai en moitos concellos, sobre todo nos máis pequenos, aínda que neste caso non son dos máis pequenos da provincia. O ideal sería non baleirar de contido aos concellos, pero son conscientes da problemática. Pregunta por algúns aspectos sobre o convenio. Indica que hai unha sanción ao Concello de San Cibrao das Viñas de case 1.2 millóns de euros que ten que afrontar o Concello polos vertidos e que foi imposta polo Consello de Ministros o 28-09-2021. Pregunta se como no convenio se fala de retroactividade a 01/02/2021, se isto implica a derivación da sanción á Deputación Provincial. Pregunta tamén se este modelo de convenio o ten solicitado tamén algún outro concello da provincia de Ourense.

O **Sr. presidente** responde que este é un convenio, non de carácter xeral, senón para o control dos vertidos dos parques industriais porque os concellos carecen de capacidade técnica, que si

ten a Deputación, pero é nese aspecto concreto. Os concellos teñen que pagar ese servizo, e o pagan ben. Non lle consta, dende que el é presidente, que ningún concello o solicitara, pero se algún ten esa necesidade sobre parques industriais, tería o mesmo trato. Falamos das cabinas de control.

**D.<sup>a</sup> Marta Nóvoa Iglesias, do Grupo Popular,** indica que non se interrompeu a policía medioambiental que se ven facendo. Os controis se seguiron facendo e dende o Concello se pagou o servizo. Indica que o Concello paga unha cantidade importante que ven recollida no Convenio. Respecto á multa de 1.2 millóns de euros, indica que se produce despois de varios avisos que fixo a Confederación e non son por vertidos que afectan a esas cabinas, senón por escumas no río que non son capaces de detectar esas cabinas, xa que as escumas tecnicamente non cambian o PH e non as detectan, e chegan á depuradora e deben desfacerse con antiescumantes. Indica que carecen dun tanque e polas choivas non se pode atallar o problema e chegan ao Barbaña. As escumas son moi difíciles de eliminar pero destaca que a sanción da Confederación é por escumas. Pero este traballo de policía medioambiental non se deixou de facer, só faltaba levalo ao Pleno.

**Don Xosé Manuel Puga González, do BNG,** di que se debe axilizar o tema da nova depuradora. Ante o problema dos residuos ao río o importante é buscar os atallos para que iso se solucione o máis axiña.

**D.<sup>a</sup> Marína Vaz Quintillan, do Grupo Socialista,** di que fan reserva de voto para o Pleno e pregunta se esta ferramenta se faría extensible a outros concellos, pero xa se aclarou polo presidente que se estendería a outros concellos se o precisen.

O **Sr. presidente** responde que falamos dun control de vertidos industriais e non se faría ningunha diferenciación con respecto a outros concellos.

Non se producen máis intervencións e co voto favorable do Grupo Popular (6) e de DO (2) e a abstención do Grupo Socialista (4) e do BNG (2), a comisión ditamina favorablemente a adopción, por parte do Pleno, do seguinte acordo:

***1.- Aprobar o convenio para o exercicio por parte da Deputación Provincial, en réxime de competencia delegada, das funcións municipais en materia de policía medioambiental de vertidos ás redes e infraestruturas municipais de saneamento e depuración de augas residuais nos concellos do Pereiro de Aguiar e San Cibrao das Viñas, co seguinte contido:***

**Primeira.-** Obxecto

Constitúe o obxecto deste convenio a delegación na Deputación Provincial de Ourense do exercicio das competencias dos concellos de O Pereiro de Aguiar e de San Cibrao das Viñas en materia de policía medioambiental de vertidos ás redes e infraestruturas municipais de saneamento e depuración de augas residuais, establecendo o marco regulador desta fórmula de cooperación.

**Segunda.-** Ámbito territorial, funcional e temporal da delegación obxecto do convenio.

1.- En virtude deste convenio, os concellos de O Pereiro de Aguiar e de San Cibrao das Viñas delegan na Deputación Provincial de Ourense o exercicio das competencias que a lexislación vixente lle atribúe aos concellos en materia de policía de vertidos ás redes e infraestruturas municipais de saneamento e depuración de augas residuais, nos termos que se recollen nesta cláusula.

2.- En concreto, son obxecto da delegación as seguintes facultades:

a) A tramitación, concesión e/ou denegación dos permisos especiais de vertido ao sistema público de saneamento e depuración regulado nas respectivas Ordenanzas municipal reguladoras do servizo público de saneamento e depuración de augas residuais.

b) A función de inspección para que se cumpran as condicións establecidas nas Ordenanzas municipais reguladoras do servizo público de saneamento e depuración de augas residuais.

c) A xestión tributaria e recadación das seguintes taxas:

a. No caso do municipio de O Pereiro de Aguiar, as establecidas na Ordenanza fiscal reguladora da taxa pola prestación do servizo municipal de control de vertidos de augas residuais procedentes do Parque Empresarial do Concello de O Pereiro de Aguiar ou aquelas que as substitúan.

b. No caso do municipio de San Cibrao das Viñas, as establecidas na Ordenanza fiscal reguladora da taxa pola prestación do servizo municipal de control de vertidos de augas residuais procedentes de establecementos mercantís ou industrias no municipio ou aquelas que as substitúan.

d) O exercicio da potestade sancionadora en materia de vertidos industriais ás redes e infraestruturas municipais de saneamento e depuración de augas residuais.

e) O exercicio das accións administrativas de restablecemento da legalidade, imposición de medidas correctoras e esixencia de responsabilidade patrimonial por danos e perdas aos bens e

dereitos de titularidade municipal en materia de vertidos industriais ás redes e infraestruturas municipais de saneamento e depuración de augas residuais.

f) A resolución de calquera clase de recursos ou reclamacións administrativas contra os actos ditados no exercicio da delegación conferida neste convenio.

g) A declaración de lesividade e a revisión de oficio dos actos administrativos ditados no exercicio das facultades delegadas.

No exercicio das facultades delegadas, a Deputación Provincial exercerá cantas potestades administrativas lle atribúe o ordenamento xurídico.

As competencias delegadas exerceranse en todo momento con estrito cumprimento da normativa aplicable, incluíndo as ordenanzas municipais vixentes na materia.

1. Non forman parte do obxecto da delegación as seguintes competencias, cuxo exercicio queda reservado aos concellos:

- a) A aprobación de ordenanzas municipais na materia.
- b) A ordenación e imposición de taxas polo exercicio das funcións delegadas, mediante as correspondentes ordenanzas fiscais.

2. O exercicio das competencias delegadas levaranse a cabo nos termos municipais de O Pereiro de Aguiar e de San Cibrao das Viñas.

3. A delegación conferida será efectiva durante toda a vixencia do convenio.

**Terceira.-** Mecanismos de control do exercicio das facultades delegadas.

1. O control do exercicio das facultades delegadas por parte da Deputación será realizado polos concellos a través da Comisión de Seguimento, prevista na cláusula quinta. Para este efectos, a Comisión de Seguimento, por unanimidade, poderá establecer directrices para o mellor funcionamento do servizo, que serán de obrigado cumprimento para a Deputación Provincial.

Os concellos poderán obter ou solicitarlle, en calquera momento, información á Deputación Provincial sobre o exercicio das competencias delegadas, mediante escrito dirixido á Presidencia. A información deberá remitirse no prazo máximo de cinco días hábiles dende que a solicitude tivese entrada no rexistro de entrada de documentos da Deputación Provincial.

Sen prexuízo deste dereito, a Deputación Provincial manterá informada, de xeito periódico, á Comisión de Seguimento sobre a marcha do servizo.

2. En todo caso, os concellos resérvanse o dereito a resolver unilateralmente o convenio nos termos previstos na cláusula sexta.

**Cuarta.-** Réxime económico do convenio.

A execución deste convenio non producirá obrigas económicas para as partes, e a Deputación Provincial asumirá o exercicio delegado das competencias municipais sen contraprestación a cargo dos concellos, agás no caso do exercicio delegado das competencias de xestión tributaria e recadación, no que se aplicará a taxa prevista na vixente ordenanza fiscal provincial.

No obstante o anterior, as multas impostas no exercicio delegado da potestade sancionadora constituirán un recurso da facenda provincial, cedéndose o dereito ao seu ingreso a favor da Deputación Provincial.

No suposto en que os Concellos chegaran a establecer unha taxa polos servizos prestados pola Deputación en virtude desde convenio -como a tramitación do permiso especial de vertido ou a realización de inspeccións-, a dita taxa entenderase igualmente cedida a favor da Deputación Provincial.

**Quinta.-** Comisión de Seguimento.

1. Establécese unha Comisión de Seguimento do convenio, integrada polos seguinte membros:

a) En representación da Deputación Provincial:

- A presidencia, ou deputado/a no/na que delegue. Corresponderalle, ademais, as funcións de presidencia da comisión.
- A xefatura do Gabinete de Asesoría Xurídica e Asistencia a Municipios e o Director/a da Área Medio Ambiente, ou funcionarios/as que legalmente os/as substitúan, en todos os casos con voz pero sen voto.

b) En representación de cada un dos concello:

- A Alcaldía, ou concelleiro/a no/na que delegue, que poderá comparecer asistido de funcionarios/as ou técnicos municipais, estes últimos con voz pero sen voto.

As funcións de secretaría da Comisión de Seguimento corresponderalle a Xefatura do Gabinete de Asesoría Xurídica e Asistencia a Municipios, sen prexuízo da súa condición de vogal.

2. A Comisión de Seguimento terá carácter paritario, correspondéndolle a cada concello representado un voto.

3. Son funcións da comisión as seguintes:

- a) Ser informada, polo menos anualmente, do estado de execución do convenio, así como das incidencias advertidas en cada exercicio.
- b) Informar calquera modificación ou novación deste convenio.
- c) Coñecer as propostas, queixas e suxestións que as partes poidan formularlles ao resto das entidades asinantes.
- d) Informar os supostos de resolución de convenio.

4. A Comisión de Seguimento adoptará os seus acordos por maioría simple.

5. No non previsto neste convenio, o funcionamento da Comisión de Seguimento rexerese polas normas de funcionamento de órganos colexiados establecidas no título II da Lei 40/2015, de 1 de outubro, de Réxime Xurídico do Sector Público.

**Sexta.-** Extinción anticipada do convenio.

1. Serán causas de resolución anticipada do convenio as seguintes:

- a) Por mutuo acordo entre as partes.
- b) Por denuncia de calquera das partes, formulada cunha antelación mínima de tres meses ó remate de cada ano natural. Os efectos da extinción anticipada do convenio entenderase referido, neste supostos, ó día natural seguinte a aquel no que se formule a denuncia.

2. Unha vez resolto o convenio, este entrará en liquidación, que formulará a Deputación Provincial, trala audiencia previa dos concellos, e na que se incluírán os danos e perdas ocasionados polo incumprimento de obrigas convencionais, de ser o caso. O pago das obrigas derivadas da dita reclamación poderá reclamárselle á entidade que se considere responsable, e contra o rexeitamento expreso ou tácito desta poderán interpoñerse os recursos e exercerse accións contempladas no ordenamento vixente.

**Sétima.-** Natureza e réxime xurídico.

Este convenio terá natureza administrativa. A súa revisión en vía xudicial, así como a dos actos e acordos ditados na súa execución ou derivados deste corresponderalles ós órganos da xurisdición contencioso – administrativa.

**Oitava.-** Duración do convenio

O presente convenio terá unha duración de catro anos, tras a publicación no Boletín Oficial da Provincia.

En calquera momento antes da finalización do prazo previsto os asinantes do convenio poderán acordar unanimemente a súa prorroga por un período de hasta catro anos adicionais ou a súa extinción.

**Novena. Entrada en vigor y efectos.**

Este Convenio entrará en vigor o mesmo día da publicación no BOP e despregará os seus efectos con carácter retroactivo desde o 1 de febreiro de 2021.

**2. Ordenar que se publique este acordo no Boletín Oficial da Provincia, para xeral coñecemento.**

**3º.- MOCIÓNS DE URXENCIA.-** Non se presentan.

**4º.- ROGOS E PREGUNTAS.-** Nesta quenda prodúcense as seguintes intervencións:

**D.<sup>a</sup> María Xosé Mangana Guede, do BNG,** pregunta se lle poden dar información do encoro que se está a facer en Castrelo de Miño, na central hidroeléctrica, a través dun proxecto privado presentado ante o Ministerio.

O **Sr. presidente** responde que non ten ningunha información e que non lle consta ningunha comunicación ni ningún trámite ata o día de hoxe ante esta Deputación.

**D.<sup>a</sup> María Xosé Mangana Guede, do BNG,** pregunta se se vai seguir a política de traballo das brigadas de medio ambiente, xa que cando non as require ningún concello van traballar sempre aos mesmos concellos, polo menos esa é a información que teñen, parece ser que no Concello de Muíños teñen traballo dabondo, e pregunta se se pode redistribuír de forma coherente para que fagan traballos en todos os concellos con independencia de que soliciten.

O **Sr. presidente** responde que as brigadas están a demanda, e segundo as peticións que fan. De momento van sendo atendidas pola orde que entran. Cada vez os concellos as demandan máis. De momento hai capacidade para atender as peticións. Os concellos fan a petición por

escrito indicando o obxecto e a medida que entran e as vamos atendendo. Cando teñamos un número de solicitudes que non se poden atender, arbitrase un sistema que priorice os usos. Ata agora van sendo atendidas as demandas.

**D.<sup>a</sup> María Xosé Mangana Guede, do BNG,** pregunta sobre a situación do hotel termal previsto neste edificio.

O **Sr. presidente** responde que de momento seguen as canles ordinarias, estamos co trámite das concesións da calidade da auga e do seu aproveitamento. As cousas terán que seguir esa orde, primeiro a declaración de auga mineiro medicinal e posteriormente a súa concesión.

**D.<sup>a</sup> Marina Vaz Quintillán, do Grupo Socialista,** fai un rogo sobre o convenio de recollida de cans, xa que hai dous anos se excluíu e suprimiu a recollida de gatos, obrigando aos concellos a asumir a esterilización e alimentación dos gatos, carecendo estes das instalacións necesarias e do financiamento destes gastos. Por isto solicita que no convenio de recollida de cans, se volva asumir de novo a recollida de gatos, ou se non se pode, que se dote aos concellos dunha compensación económica para facer fronte a estes gastos que supoñen un problema moi importante para moitos concellos.

O **Sr. presidente** responde que non ten agora os datos concretos de cantos cans nin gatos se recollen. Non son obxecto do convenio, se viñan facendo, pero a recollida de cans saturou o servizo. Os concellos protéstanlle á Xunta, e esta ao Goberno Central. Indica que dará unha contestación máis rigorosa, deixouse de facer a recollida de gatos, e trasladará a petición xa que os concellos non teñen capacidade de facer estas cousas.

E, ás 17.45 horas, dáse por finalizada a reunión, redactándose a presente acta que se asinará electronicamente. Dou fe.